

摘藻堂四庫全書薈要

史部

欽定四庫全書薈要

史部
明史卷三百十三
四

詳校官中書臣劉源溥



欽定四庫全書蒼要卷六千九百六

史部

明史卷三百十三

大學士張廷玉等奉 敕修

列傳第二百一

雲南土司

明洪武十四年大軍至滇梁王走死遂置雲南府自是諸郡以次來歸垂及累世規制咸定統而稽之大理臨安以下元江永昌以上皆府治也孟艮孟定等處則為

司新化北勝等處則為州或設流官或仍土職今以諸
府州緊列之土司者從其始也蓋滇省所屬多蠻夷雜
處即正印為流官亦必以土司佐之而土司名目淆雜
難以縷析故係之府州以括其所轄而於土司事迹止
撫其大綱有關乎治亂興亡者載之俾控馭者識所鑒
焉

雲南土司一

雲南

大理

臨安

楚雄

澂江

景東

廣南

廣西

鎮沅

永寧

順寧

蒙化

孟艮

孟定

耿馬安撫司附

曲靖

雲南滇國也漢武帝時始置益州郡蜀漢置雲南郡隋

置昆州唐仍之後為南趙蒙氏所據改鄯闡府厯鄭趙楊三氏至大理段氏以高智昇領鄯闡牧遂世其地元初置鄯闡萬戶府既改置中慶路封子和克齊為雲南王鎮之仍錄段氏子孫守其土和克齊死其子嗣封為梁王洪武六年遣翰林待制王禕等齎詔諭梁王久留不遣卒遇害八年復遣湖廣行省參政吳雲往中途為梁使所害十四年征南將軍傅友德藍玉沐英率師至雲南城梁王赴滇池死定其地改中慶路為雲南府置都指

揮使司命都督僉事馮誠署司事二月詔諭雲南諸郡
蠻十五年友德等分兵攻諸蠻寨之未服者土官楊苴
乘隙作亂集蠻衆二十餘萬攻雲南城時城中食少士
卒多病寇至都督謝熊馮誠等攬城固守賊亦不能攻
遂遠營為久困計時沐英方駐師烏撒聞之將驍騎還
救至曲靖遣卒潛入報城中為賊所得紹之曰總兵官
領三十萬衆至矣賊衆驚愕拔營宵遁走安寧羅次邵
甸富民晉寧大理江川等處復據險樹柵謀再寇英分

兵勦降之斬首六萬餘級生禽四千餘人諸部悉定十
六年三月師還詔英留鎮英卒子春襲封西平侯仍鎮
雲南自英在鎮十年恩威著于蠻徼每下片楮諸番部
具威儀出郭叩迎盥而後啓曰此令旨也沐氏亦皆能
以功名世其家每大征伐輒以征南將軍印授之沐氏
未嘗不在行間數傳而西平裔孫當襲侯守臣爭之謂
滇人知有黔國公不知西平侯也孝宗以為然許之自
是遂以公爵佩印為故事諸土司之進止子奪皆咨稟

及承平久文網周密凡事必與太監撫按三司會議後
行動多掣肘土官子孫承襲有積至二三十年不得職
者土官復慢令玩法無所忌憚待其罪太惡極然後興
兵征勦致軍民日困地方日壞大學士楊一清等因武
定安銓之亂痛切陳之黔國公沐紹勲亦以為言雖得
旨允行亦不能更革馴至神宗之世朝廷情媿封疆敗
壞日甚一日緬莽之叛皆土官之失職者導之雖稍奏
膚功而滇南喪敗卒由土官沙定洲之禍沙定洲者王

美山長官司沙源之子也源驍勇有將材萬厯中數從征調有功巡撫委以王美副長官事繼以征建水功以安南長官司廢地畀之後征東川水西馬龍山等處全雲南會城稱首功累加至宣撫使時號沙兵定洲其仲子也崇禎中元謀土知州吾必奎叛總兵官沐天波剿之調定洲從征定洲不欲行出怨言會奸徒饒希之余之錫朋者逋天波金無以償錫朋常出入土司家誇黔府富盛定洲心動陰結都司阮韻嘉諸人為內應既定洲

入城辭行天波以家諱曰不視事定洲譟而入焚劫其
府天波聞變由小竇遁時寧州土司祿永命在城方巷
戰拒賊從官周鼎止天波留討賊天波疑鼎為定洲誘
已殺之其母妻皆走城北自焚死定洲據黔府盤踞會
城刼巡撫吳兆元使題請代天波鎮滇傳檄州縣全滇
震動祿永命與石屏州龍在田俱引所部去天波走楚
雄金滄副使楊畏知奉調駐城中謂天波曰公何不走
永昌使楚得為備而公在彼犄角首尾牽制之上策也

天波從之定洲至楚雄城閉不得入乃去遣其黨王翔李日芳等攻陷大理蒙化畏知乘間檄城外居民盡入城築陴濬隍調土漢兵守之定洲聞祿永命等各固守不敢至永昌恐懼知截其歸路急還兵攻楚雄畏知坐城樓賊發巨礮擊之煙焰籠城櫓衆謂畏知已死而畏知端坐自如賊相驚謂神畏知伺賊間輒出奇兵殺賊甚衆賊引去攻石屏不下還攻寧州祿永命戰死賊計迤東稍稍定乃復攻楚雄分兵為七十二營環城掘濠

為久困計會張獻忠死其部將孫可望率餘衆由遵義
入黔稱黔國焦夫人弟來復仇民久困沙兵喜其來迎
之定洲解楚雄圍迎戰于草泥關大敗遁阿迷可望破
曲靖及交水俱屠之遂由陸涼宜良入雲南城分遣李
定國徇迤東諸府而可望自率兵西出畏知禦于啓明
橋兵敗被執可望聞其名不殺語之曰吾與爾共討賊
何如畏知要以三事不用獻忠偽號不殺百姓不擄婦
女吾從爾可望皆許之即折箭相誓乃以書諭天波如

畏知言天波亦來歸而李定國之徇臨安者定洲部目李
阿楚拒戰甚力定國穴地置礮礮發城陷遂入驅城中
官民于城外白場殺之凡七萬八千餘人斬獲不與焉
當時皆意定國破臨安必襲阿迷取定洲乃僅掠臨安
子女而回所過無不屠滅迤西以畏知在軍得保全始
定洲歸屯兵洱革龍且借安南援自固會可望與定國
不協聲其罪杖之百責以取定洲自贖定國既至定洲
土目楊嘉方迎定洲就其營宴定國偵知之率兵圍營

相拒數日乃出降遂械定洲及妻萬氏數百人回雲南
剝其皮市中可望遂據滇而天波卒走死於緬甸

大理唐葉榆縣境麟德初置姚州都督府開元末蒙詔
皮羅閣逐洱河蠻取太和城至閣羅鳳號大蒙國徙治
太和為南詔異牟尋改大禮國後鄭買賜趙善政楊干
貞互篡奪五代晉時段思平得之更號大理國元憲宗
征滇至大理段智興降附乃說都元帥封智興為瑪哈
羅噶管領八方又以劉時中為宣撫使同智興安輯其

民段氏有大理傳十世至寶聞太祖開基江南遣其叔
段真由會川奉表歸款洪武十四年征南將軍傅友德
克雲南授段明為宣慰使明遣都使張元亨貽征南將
軍書曰大理乃唐交綏之外國鄯闡實宋斧畫之餘邦
難列營屯徒勞兵甲請依唐宋故事寬我蒙段奉正朔
佩華篆比年一小貢三年一大貢友德怒辱其使明再
貽書曰漢武習戰僅置益州元祖親征祇緣鄯闡乞賜
班師友德答書曰大明龍飛淮甸混一區宇陋漢唐之

小智卑宋元之淺圖大兵所至神龍助陣天地應符汝

段氏接武蒙氏運已絕于元代寬延至今我師已殲梁

王報汝世仇不降何待十五年征南左將軍藍玉右將

軍沐英率師攻大理大理城倚點蒼山西臨洱河為固

聞王師至聚衆扼下關下關者南詔皮羅閣所築龍尾

關也號極險玉等至品甸遣定遠侯王弼以兵由洱水

東趨上關為犄角勢自率衆抵下關造攻具遣都督胡

海洋由石門間道夜渡河繞出點蒼山後攀木援崖而

上立旗幟昧典軍抵下關者望見皆踴躍譟蠻衆驚
亂英身先士卒策馬渡河水沒馬腹將士隨之遂斬關
入蠻兵潰拔其城酋長段世就禽世明叔父也並俘寶
孫苴仁苴義至京帝諭曰父寶曾有降表朕不忍廢賜
苴仁名歸仁授雁門衛鎮撫苴義名歸義授永昌衛鎮
撫大理悉定因改大理路為府置衛設指揮使司十六
年品甸土酋杜惠來朝命為千夫長命六安侯王志安
慶侯仇成鳳翔侯張龍督兵往雲南品甸繕城池立屯

堡置郵傳安輯人民十七年以土官阿這為鄧川知州
阿散為太和府正千夫長李朱為副千夫長楊奴為雲
南縣丞十九年置雲南洱海衛指揮使司以賴鎮為指
揮僉事洱海本品甸也兵燹後人民流亡室廬無復存
者鎮至復城池建譙樓治廬舍市里修屯堡隄防斥堠
又開白鹽井民始安輯二十年詔景川侯曹震及四川
都司選精兵二萬五千人給軍器農具即雲南品甸屯
種以俟征討永樂以後雲南諸土官州縣率按期入貢

進馬及方物朝廷賜予如制嘉靖元年改十二關長官司于一泡江之西從巡撫何孟春奏也

臨安古句町國漢置縣唐為羈摩牂州地天寶末南詔蒙氏于此置通海郡元時內附置阿梵部萬戶府至元中改臨安路屬臨安廣西元江等處宣慰司洪武十四年征南將軍下雲南遣宣德侯金朝興分道取臨安元右丞鄂博台元帥旺札勒圖及土官楊政降改路為府廢宣慰司置臨安衛指揮使司十七年以土官和寧為

阿速知州弄甥為寧州知州陸羨為蒙自知縣普少為
納樓茶甸副長官俱來朝貢給誥敕冠帶以命之十八
年臨安府千戶納速丁等來朝人賜米十石永樂九年
溪處甸長官司副長官自恩來朝貢馬及金銀器賜賚
如例自恩因言本司歲納海肥七萬九千八百索非土
所產乞准鈔銀為便戶部以洪武中定額難准折輸帝
曰取有子無適以厲民况彼遠蠻尤當寬恤其除之宣
德五年中官雲仙還自雲南奏設東山口巡檢司以故

土官後普覺為之八年虧容甸長官司奏河底江自洪武中官置渡船路通車里八百近年軍民有逃逸出境詐稱使者迫令乘載往往被害又沿河時有劫盜出沒乞置巡檢司以故把事袁凱之子瑀為巡檢從之嘉靖元年復設寧州流官知州掌州事土知州祿氏專職巡補寧州舊設流官正德初土官祿倖陰賄劉瑾罷之遂交通彌勒州十八寨強賊為亂為官軍捕誅其子祿世爵復以罪論死撫按請仍設流官從之初臨安阿迷州

土官普柱洪武中為土知州後設流錄其後覺為東山
巡檢既而以他事廢正德二年以廣西維摩王美山與
阿迷接壤盜出沒仍令普覺後納繼前職普維藩者與
寧州祿氏構兵師殲焉維藩子名聲幼育于官既長有
司俾繼父職名聲收拾舊部勇于攻戰從討奢安有功
仍授土知州漸驕恣崇禎五年御史趙洪範按部名聲
不出迎已出戈甲旗幟列數里洪範大怒謀之巡撫王
伉請討得旨官軍進圍州城名聲恐使人約降而陰以

重賄求援于元謀土官吾必奎時官軍已調必奎隨征
必奎與名聲戰兵始合佯敗走官軍望見遂大潰布政
使周士昌戰死朝廷以起釁罪伉逮治而名聲就撫然
驕恣益甚當事者頗以為患已而廣西知府張繼孟道
出阿迷以計毒殺之必奎聞名聲死遂反連陷武定祿
豐楚雄諸城寧州土官祿永命石屏州土目龍在田俱
與必奎名聲從征著名至是黔國公沐天波檄之統兵
合勦禽必奎名聲妻萬氏本江西寄藉女淫而狡名聲

死後改嫁王美山副長官沙源之子定洲名聲有子曰
服遠與萬民分寨居定洲誘殺服遠併其地天波檄定
洲取必奎定洲不欲行遂反詳前傳臨安領州四縣四
其長官司有九曰納樓茶甸曰教化三部曰溪處甸曰
左能寨曰王美山曰虧容甸田思陀甸曰落恐甸曰安
南其地皆在郡東南西平侯征安南取道于此蓮花灘
之外即交荒外而臨安無南面之虞者以諸甸為之備
也但地多瘴流官不欲入諸長官亦不請代襲自相冠

帶日尋干戈納樓部內有礦場三曰中場鷺黃摩訶封
閉已久亡命多竊取之其安南長官司本阿焚蠻所居
舊名褒古後名捨資元為捨資千戶所以地近交趾改
安南屬臨安路正德八年蒙自土舍祿祥爭襲父職鳩
殺其嫡兄祿仁安南長官司土會那代助之以兵遂稱
亂守臣討平之事聞命革蒙自土官改長官司為新安
守禦千戶所調臨安衛中所官軍戍之

楚雄昔為威楚元憲宗置威楚萬戶府至元後置威楚

開南路宣撫司洪武十五年南雄侯趙庸取其地改為
楚雄府十七年以土官高政為府同知阿魯為定邊縣
丞永樂初楚雄府言所屬蠻民不知禮義惟焚種性溫
良有讀書識字者府州已嘗設學教養其縣學未設縣所
轄六里蠻人過半請立學置官訓誨從之宣德五年命
故土知府高政女襲同知政初為同知永樂中來朝時
仁宗監國嘉其誠勤陞知府子孫仍龍同知政卒無子
妻襲又卒其女奏乞襲知府帝曰皇考有成命令襲同

知八年陞南安州琅井土巡檢李保為州判官以鄉老
言本州俱羅舞和泥烏蠻雜類稟性頑獷以無土官管
束多致流移差役賦稅俱難理辦衆嘗推保署州事撫
綏得宜民皆向服流移復歸乞授本州土官吏部言南
安舊無土官難從其請帝以為治在順民情從之九年
黔國公沐晟等奏楚雄所屬黑石江及泥坎村銀場軍
民盜礦千百為羣執兵攘奪楚雄縣賊首者些糾合武
定賊者惟等刼掠軍民殺巡檢張禎又定邊縣阿苴里

諸處強賊聚衆抄掠景東等衛大理蒙化楚雄姚州皆有盜出沒帝敕責晟等期以三年討靖諸為亂者嘉靖四十三年楚雄叛蠻阿方等兵起先攻易門所流劫峨峨昆陽新化各州縣僭稱王約土官王一心王行道為援一心後悔詣軍門請討賊自効巡撫呂光洵許之招降數百人官軍分道進禽獲賊黨乘勝攻大小木址二寨克之斬阿方首餘賊悉平

澂江唐為南寧昆二州地天寶末沒于蠻號羅伽甸宋

時大理段氏號羅伽部元置羅伽萬戶府至元中改激
江路洪武十五年雲南平激江歸附改激江府地居滇
省之中山川明秀蠶衣耕食民安于業近郡之獼獼性
雖頑狠然恭敬上官官至爭迎到家刲羊擊豕罄所有
以供之婦女皆出羅拜故于諸府獨號安靜云

景東古柘南也漢尚未有其地唐南詔蒙氏始置銀生
府後為金齒白蠻所據元中統三年討平之以所部隸
威楚萬戶至元中置開南洲洪武十五年平雲南景東

先歸附土官俄陶獻馬百六十匹銀三千一百兩馴象
二詔置景東府以俄陶知府事賜以文綺襲衣十八年
百夷思倫發叛率衆十餘萬攻景東之北吉寨俄陶率
衆禦之為所敗率其民千餘家避于大理府之白崖川
事聞帝嘉其忠遣通政司經歷楊大用齎白金文綺賜
之二十三年沐英討平思倫發復景東地因奏景東百
夷要衝宜置衛以錦衣衛僉事胡常守之俄陶仍舊職
二十四年帝以景東為雲南要害且多腴田調白崖川

軍士屯守二十六年命洱海衛指揮同知賴鎮守景東
從沐春請也宣德五年置孟緬長官司時景東奏所轄
孟緬孟梳地方遐遠屢被外寇侵擾乞并孟梳于孟緬
設長官司授把事姜嵩為長官以隸景東歲增貢銀五
十兩六年大侯土知州刀奉漢侵據孟緬地敕黔國公
沐晟遣官撫諭正統中思任發叛官軍征麓川知府陶
瓚從征有功進階大中大夫弘治十五年正月景東衛
雲霧黑暗晝夜不別者凡七日巡撫陳金以聞命廷臣

議考察以謝天變南京刑部都察院承旨考黜文武官
千二百員嘉靖中者東甸稱亂刦景東府印去土舍陶
金追斬其頭目奪印歸景東部皆焚種性淳樸習弩射
以象戰厯討鐵索米魯那鑑安銓鳳繼祖諸役皆調其
兵及戰象天啟六年貴州水西安邦彥反率衆二十萬
入滇境至馬龍後山去會城十五里總兵官調景東土
舍陶明卿率兵伏路左賊分道并至官兵禦之賊拒戰
勢甚銳明卿乃以象陣從左翼衝出橫擊賊潰奔追十

餘里巡撫上功推明卿第一景東每調兵二千必自効
千餘餉士之費未嘗仰給公家土司中最稱恭順其府
治東有邦泰山頗險峻土官陶姓所世居也

廣南宋時名特磨道士首儂姓智高之裔也元至元間
立廣南西道宣撫司初領路城等五州後惟領安寧富
二州洪武十七年歸附改廣南府以土官儂郎金為同
知十八年郎金來朝賜錦綺鈔錠二十八年都指揮同
知王俊奉命率雲南後衛官軍至廣南築城建衛郎金

父貞佑不自安結衆據山寨拒守俊遣人招之不服時
伏草莽中刦掠覘官軍進退俊乃遣指揮歐慶等分兵
攻各寨自將取貞佑又以兵扼間道絕其救援諸寨悉
破衆潰貞佑窮促就禽械送京師降郎金為府通判永
樂六年富州土知州沈絃經入貢值仁孝皇后喪絃經
奉香幣致祭宣德元年土官儂郎舉來朝貢馬正統六
年廣南賊阿羅阿思等刦掠命總兵官沐昂等招撫之
時富州土官沈政與郎舉互訐糾衆侵地帝命昂等勘

處七年昂奏二人叛逆無實迹因有隙相妄奏兵部請治政等罪帝以蠻人宥之政舉相讐殺已十餘年時方征麓川憚兵威不敢動未幾郎舉以從征功陞同知死無嗣四門舍目共推儂文舉署事屢立戰功萬厯七年實授同知子應祖從征三鄉親獲賊首詔賞銀百兩播州之役徵其兵三千討尋甸叛目皆有功賜四品服儂氏自文舉藉四門舍目推擁之力得授職後儂氏襲替必因之土官之政出于四門租稅僅取十之一道險多

瘴知府不至其地印以臨安指揮一人署之指揮出印
封一室入取必有瘟癘死亡萬厯末知府瘳鉉者避瘴
臨安以印付同知儂仕英子添壽添壽死家奴竊印并
經歷司印以逃既而歸印于其族叔儂仕祥時仕英親
弟仕卿例得襲索仕祥印仕祥不與遂獻地與泗城土
官岑接與連婚構兵滅仕卿家及仕祥死子琳以府印
送接而經歷司印又為琳弟瓊所有巡撫王懋中調兵
往問瓊懼還印于通判周憲接亦出府印獻于官時兵

方調至境遽遣歸廷議治鉉擅離與守巡失撫之罪瓊接已輸服勿問詔可未幾儂紹湯兄弟爭襲各糾交趾兵象焚掠一空

廣西隋屬牂州後為東獋烏蠻等部所居唐隸黔州都督府後師宗彌勒二部寢盛蒙段皆莫能制元憲宗時始內屬至元十二年籍二部為軍置廣西路洪武十五年歸附以土官普德署府事二十年普德及彌勒州知赤善師宗知州阿的各遣人貢馬詔賜文綺鈔錠二十

四年布政使張統奏維摩雲龍永寧浪渠越順等州縣蠻民頑惡不遵政教宜置兵戍守以控制之是後朝貢賜予如制正統六年總兵官沐昂奏師宗州及廣南府賊阿羅阿思糾合為亂命昂等招諭未幾平成化中土知府昂貴有罪革其職安置彌勒州乃置流官始築土城嘉靖元年設雲南彌勒州十八寨守禦千戶所其部衆好擄掠無紀律至水西烏撒用兵始征調之崇禎間巡按御史傳宗龍由滇入黔招普兵以行時滇中勗勗

稱沙普兵亦曰昂兵

鎮沅古濮洛雜蠻所居元史謂是和泥昔撲二蠻也唐南詔蒙氏銀生府地其後金齒楚蠻據之元時為威遠蠻棚府屬元江路總管洪武十五年總管刀平與兄那直歸附授千夫長

年置鎮沅州以刀平為知州

永樂三年刀平率其子來朝貢方物賜鈔文綺從征入百又從攻石崖者達寨外部整線來降入貢方物陞為府以刀平為知府置經歷知事各一員貢賜皆如例成

化十七年以地方未平免鎮沅諸土官朝覲正統元年復免嘉靖中征安銓調鎮沅兵千人命刀寧息領之復調其子刀仁亦率兵千人征那鑑克魚復寨初鎮沅印為那氏所奪至是得印以獻命給之領長官司一曰祿谷寨永樂十年置

永寧昔樓頭畎地接吐蕃又名荅藍唐屬南詔後為麼些蠻所據元憲宗時內附至元間置荅藍管氏官尋改永寧州隸麗江路洪武十五年屬吐勝府旋屬鶴慶府

二十九年改屬瀾滄衛十二月土賊卜百如加刦殺軍
民前軍都督僉事何福遣指揮李榮等討之其子阿沙
遁入革失瓦都寨官軍齎三日糧深入追之會大雨衆
饑疲引還永樂四年設四長官司隸永寧土官以土酋
張首等為長官給印章賜冠帶並陞永寧為府隸布政
司陞土知州各吉八合知府遣之齎敕往大西番撫諭
蠻衆宣德四年永寧蠻寨矢不刺非糾四川鹽井衛土
官馬刺非殺各吉八合官軍撫定之命卜撒襲知府復

為矢不刺非所殺已命卜撒之弟南八襲馬刺非又據永寧節卜上下三村逐南八大掠夜白尖住促卜瓦諸寨事聞命都督同知沐昂勒兵諭以禍福并移之檄四川行都司下鹽井衛諭馬刺非還所據村寨正統二年馬刺非為南八所攻拔烏節等寨南八亦言馬刺非殺害詔鎮巡官驗問令各歸侵地乃寢永寧界東至四川鹽井衛十五里西至麗江寶山州南至浪渠州北至西番領長官司四曰刺次和曰瓦魯之曰革甸曰香羅

順寧府本蒲蠻地名慶甸宋以前不通中國雖蒙氏段氏不能制元泰定間始內附天歷初置順寧府并慶甸縣後省入府洪武十五年順寧歸附以土酋阿悅貢署府事十七年命阿日貢為順寧知府二十三年土酋猛邱土知府子邱等不輸徵賦自相仇殺大理衛指揮鄭祥征蒙化賊移師至甸頭破其寨猛邱請降輸賦乃還猛邱死把事阿羅等復起兵相攻擊二十九年西平侯沐春遣鄭祥與指揮李榮等分道進討禽阿羅等誅之

後貢賜如制順寧與大侯接境宣德中大侯土舍奉赦
奉學兄弟不相能奉學倚妻父土知府猛廷瑞與兄赦
日構兵巡撫陳用賓檄參將李先著副使邵以仁勘處
以仁襲執廷瑞因請改順寧為流官先著被檄極言不
可討被謗語逮下獄瘐死然廷瑞實無反謀以參將吳
顯忠覘其富誣以助惡索金不應遂讒于巡按張應揚
轉告巡撫陳用賓廷瑞大恐不得已斬奉學以獻顯忠
益誣其陰事傳以反狀撫按會奏得旨大勦廷瑞出獻

印獻子以候命不從顯忠帥兵入其寨盡取猛氏十八代蓄貲數百萬誘廷瑞至會城執之獻捷于朝于是所部十三寨盡憤始聚兵反官兵悉勦除之并殺其子以仁超擢右都御史廕子未幾坐大避擊獄應揚亦病卒人以為天道云順寧附境有猛猛撒猛緬所謂三緬也猛猛最強部落萬人時與二猛為難其地田少箐多射獵為業猛緬地雖廣而人柔弱部長賜冠帶最忠順猛撒微弱後折入于耿馬云

蒙化唐屬姚州都督府蒙氏時細奴邏築城居之號蒙
舍設段氏改開南縣元為州屬大理洪武十七年以土
酋左禾令為蒙化州判官施生為正千夫長二十三年
西平侯沐英以蒙化所屬蠻火頭字青等梗化不服請
置衛命指揮僉事李聚守蒙化賊高天惠作亂大理衛
指揮使鄭祥捕斬之傳首雲南永樂九年冬土知州左
禾令來朝貢馬及方物賜予如例既左伽從征麓川戰
于大侯功第一進秩臨安知府掌州事正統中陞州為

府以左伽為知府世襲所部江內諸蠻性柔頗馴擾江
外數枝以勇悍稱每應征調多野戰無行伍成化十七
年巡撫奏地方未寧免蒙化土官明年朝貢正統元年
詔復免萬厯四十八年雲龍土知州段龍死子嘉龍立
養子進忠殺嘉龍爭襲流劫殺掠官軍進討進忠從間
道欲趨大理官軍禽誅之改設流官授段氏世吏目一
人

孟艮蠻名孟措自古不通中國永樂三年來歸設孟艮

府隸雲南都司以土酋刀哀為知府給印誥冠帶時刀
哀遣人來朝請設治所歲辨差發黃金六十兩六年土
知府刀交遣弟刀哄哈貢象及金銀器禮部言刀交嘗
搆兵攻剽鄰境詐譎不誠宜却其貢帝曰遠蠻能悔過
來朝往事不足責命賜鈔及絨錦綺帛是後貢賜皆如
例宣德六年命內官楊琳齎綵幣往賜孟艮知府刀光
正統間孟艮地多為木邦所并景泰中八貢知府名慶
馬辣不知于刀氏何屬也孟艮在姚關東南二千里外

沃野千里最殷富地多虎農者于樹杪結草樓以護稼
雲南知府趙混一嘗入其境待之禮慢後無復至者

孟定蠻名景麻至元中立孟定路軍民總管府領二甸
隸大理金齒等處宣慰使洪武三十五年土酋刀名扛來
朝貢方物賜綺帛鈔幣設孟定府以刀渾立為知府永
樂二年孟定土官刀景發遣人貢馬賜鈔羅綺遣使往
賜印誥冠帶襲衣復頒信符金字紅牌四年帝以孟定
道里險遠每歲朝貢不便令自今三年一貢如慶賀謝

恩不拘例初孟璉與孟定皆麓川地其土目皆故等夷
惡相屬後改孟璉隸雲南多以互侵土地仇殺宣德六
年土知州罕顏法以為言敕黔國公沐晟遣官撫諭俾
各歸侵掠正統中麓川叛孟定知府刀祿孟遁走木邦
土官罕葛從征有功總督王驥奏令食孟定之土嘉靖
間木邦罕烈據地奪印令土舍罕慶守之名為耿馬地
之所入悉歸木邦萬曆十二年官兵取隴川平孟定故
地以罕葛之後為知府十五年頒孟定府印崇禎末孟

定叛降于緬甸其地自姚關南八日程西接隴川東連
孟連南木邦北鎮康土瘠人稀有馬援城在焉領安撫
司一曰耿馬萬厯十二年置以們罕為安撫使與孟定
隔喳哩江孟定居南耿馬居北罕死弟們罕金護印屢
奉朝貢時木邦思禮作亂侵灣甸鎮康倚罕金為聲援
天啟二年緬人攻猛乃孟艮罕金欲救之緬移兵攻金
金厚賂之乃解後與木邦罕正構難不絕云

曲靖隋恭協二州地唐置南寧州改恭州為曲州分協

州置靖州元憲宗時置磨彌部萬戶至元時改曲靖路
宣慰司洪武十四年傅友德下雲南元曲靖宣慰司征
行元帥張麟行省平章劉輝等來降十五年改曲靖千戶
所為曲靖軍民指揮使司置曲靖軍民府十六年霑益
州土官安素叔安磁等貢馬及獬獬刀甲氍衫虎皮詔
賜磁冠帶綺羅衣各一襲并文綺鈔錠羅雄州土酋納
居來朝賜鈔幣十七年亦佐縣土酋安伯作亂西平侯
沐英發兵討降之二十年越州土酋阿資與羅雄州營

長發東等叛阿資者土官龍海子也越州蠻呼為苦麻
部元末龍海居之所屬俱囉囉斯種王師征南時英駐
兵其地之湯池山龍海降遂遣子入朝詔以龍海為知
州尋為亂英禽之徙遼東至蓋州病死阿資繼其職益
桀驁至是叛帝命英會征南將軍傅友德進討道過平
夷以其山險惡宜駐兵屯守遂遷其山民往居卑午村
留神策衛千戶劉成等將千人置堡其地後以為平夷
千戶所阿資等率衆寇普安燒府治大肆剽掠友德率

兵擊之斬其營長二十二年友德等進攻土官普旦來降阿資退屯普安倚崖壁為寨友德以精兵蹙之蠻衆皆緣壁攀崖墜死者不可勝數生禽一千三百餘人獲馬畜甚衆阿資遁還越州復追擊敗之斬其黨五十餘人阿資窮蹙請降初阿資之遁也揚言曰國家有萬軍之勇我地有萬山之險豈能盡滅我輩英乃請置越州龍馬二衛扼其險要復分兵追捕至是遂降英等以陸涼西南要地請設衛屯守命洱海衛指揮僉事滕聚于

古魯昌築地置陸涼衛指揮使司英又言曲靖指揮千戶哈喇布哈乃故元守禦陸涼千戶今陸涼置衛宜調于本衛鎮守庶絕後患詔從之帝以平夷尤當要衝四面皆諸蠻部落乃遣開國公常昇往辰陽集民間丁壯五千人統以右軍都督僉事王成即平夷千戶所改置衛二十三年置越州衛二十四年徙越州衛于陸涼州以英言雲南諸蠻皆降惟阿資恃險屢叛宜徙衛軍守禦已阿資復叛命都督僉事何福為平羌將軍率師進

討屢敗賊衆會連月淫雨水溢阿資援絕與其衆降福
擇曠地列柵以置其衆西南有木蓉箐賊常出沒處復
調普安衛官軍置寧越堡鎮之然阿資終不悛二十七
年阿資復反西平侯沐春及福率兵營于越州城北遣
壯士伏于歧路而以兵挑戰蠻兵悉衆出伏起大敗之
阿資脫身遁初曲靖土軍千戶阿保張琳所守地與越
州接壤部衆多相與貿易春使人結阿保等覘阿資所
在及其經行地星列守堡絕其糧道賊益困二十八年

福潛引兵屯赤窩鋪遣百戶張忠等擣賊巢禽阿資斬之俘其黨越州乃平自是以後諸土官按期朝貢西南晏然正統二年曲靖軍民知府晏毅言四事一土官承襲或子孫或兄弟或妻繼夫或妾繼嫡皆無豫定次序致臨襲爭奪仇殺連年乞敕該部移文所司豫為定序造冊土官有故如序襲職一請卹陣亡子孫一請雲南官俸悉如四川之例一均戶口田地事下所司議行毅復請設霑益州松韶巡檢從之嘉靖中羅雄知州者濬

殺營長奪其妻生子繼榮稍長即持刀逐濬濬欲置之死以其母故不忍及濬請老以繼榮代襲繼榮遂逐濬濬訴之鎮巡官命迎濬歸繼榮陽事之實加禁錮萬厯九年調羅雄兵征緬繼榮將行恐留濬為難遂殺濬時霑益土知州安世鼎死妻安素儀署州事亦提兵赴調繼榮與之合營通焉且倚霑益兵力為助師過越州留上官資氏家淫樂不進知州越應奎白于兵備將禽之繼榮走遂聚衆反攻破陸涼鴨子塘陟陂諸寨築石城

于赤龍山據龍潭為險廣六十里名已所居曰龍樓鳳閣環以羣寨實諸軍士妻女其中十三年巡撫劉世曾乃檄諸道進兵適劉綎破緬解官回世曾以兵屬綎綎連馳赴普蘇營直搗赤龍寨斬賊渠帥繼榮遁去綎復連破三寨降其衆一萬七千人追奔至阿拜江斬繼榮賊平世曾請築城改設流官乃以何倭為知州者繼仁為巡檢未幾蠻寇必大反殺繼仁執倭參將蔡兆吉等討定之乃改羅雄州曰羅平設千戶所曰定雄時霑益

安素儀無子以烏撒土官子安紹慶為嗣慶死孫安遠襲土官設科作亂逐安遠糾衆焚掠霑益諸堡站陷平夷衛天啟三年官兵禽設科誅之五年安邊據霑益從水西叛事詳烏撒傳中初越州阿資罪誅永樂間以其子祿寧為土縣丞與亦佐沙氏分土而居其地南北一百二十里土高精強征調銀至三千八百兩曲靖境內有交水去平夷衛二舍與黔接壤滇師出上六衛必由之道天啟初水西用兵撫臣議曲靖銷鑰全滇交水當

黔滇之衝乃阨塞要地平夷右所宜移置交水去險築
城俾與平夷衛相望互為聲援報可

明史卷三百十三

欽定四庫全書

明史卷三百十三考證

雲南傳攻石屏不下

臣章宗瀛按楊畏知傳稱是時

賊攻石屏寧州嶧峨皆陷之此作攻石屏不下互異

謹附考

雲南傳祿永命戰死

臣章宗瀛按祿永命

賜謚另載卷末謹識

臨安傳布政使周士昌戰死

臣章宗瀛按周士昌

賜謚另載卷末謹識

臨安傳曰思陀甸

臣章宗瀛按思陀地理志作思陀

考明統志及蠻司合誌諸書皆作陀地理志所載誤
謹附考

景東傳因奏景東百夷要衝宜置衛以錦衣衛僉事胡
常守之

臣

章宗瀛按是時立景東衛命陶往鎮而

別以流官掌印蒞府事陶至鎮勤慎守法因仍復知
府頒賜金帶且鐫誠心報國四字褒之見明實錄與

此小異謹附考

景東傳置孟緬長官司

臣章宗瀛按宣德五年六月

置孟緬長官司屬景東府後直隸布政使萬曆二十五年改屬順寧府之雲州見明實錄謹附識

廣西傳設雲南彌勒州十八寨守禦千戶所

臣章宗

瀛按一統志彌勒州西有十八寨山嘉靖元年二月置守禦千戶所於此謹附識

鎮沅傳建文四年置鎮沅州

臣章宗瀛按地理志稱

鎮沅州為洪武三十五年十二月所置則其事在成祖時矣謹附識

鎮沅傳陞為府

臣章宗瀛按明實錄鎮沅之陞為府

在永樂四年四月己卯此概紀於三年之後未晰謹

附考

順寧傳誘廷瑞至會城執之獻捷於朝

臣章宗瀛按

萬歷二十五年以平猛廷瑞亂改順寧為流官知府
改大候州為雲州設流官知州見明實錄謹附識

孟良傳設孟良府

臣章宗瀛按孟良府初置時隸雲

南都司後隸雲南布政司見一統志謹附識

孟定傳洪武三十五年土酋刀名扛來朝貢方物賜綺

帛鈔幣設孟定府

臣章宗瀛按明實錄洪武十五

年三月己未設雲南五十二府孟定已居其一此稱

洪武三十五年設孟定府互異謹附考

曲靖傳十五年改曲靖千戶所為曲靖軍民指揮使司

置曲靖軍民府

臣章宗瀛按地理志曲靖於洪武

十五年三月為府二十七年四月升為軍民府與此
所載小異謹附考

曲靖傳正統二年曲靖軍民知府晏毅言四事 臣章

宗瀛按正統七年三月復曲靖衛定南堡堡置於洪
武間後廢至是以王驥等言平夷白水堡去曲靖遠
且田土荒蕪宜復立定南堡撥兵屯守從之見明實
錄謹附識

明史卷三百十三考證

乾隆四十一年

賜謚諸臣

祿永命 周士昌

以上通謚節愍

欽定四庫全書舊要卷六千九百七

史部

明史卷三百十四

大學士張廷玉等奉 敕修

列傳第二百二

雲南土司二

姚安

鶴慶

武定

尋甸

麗江

元江

永昌

新化

威遠

北勝

灣甸

鎮康

大侯

瀾滄衛

麓川

姚安本漢弄棟蜻蛉二縣地唐置姚州都督府以民多姚姓也天寶間南詔蒙氏改為弄棟府宋時段氏改姚州元立統矢千戶所天厯間陞姚安路洪武十五年定

雲南改為府十六年姚安土官自久作亂官兵往討師次九十九莊自久遁去明年復寇品甸西平侯沐英奏以土官高保為姚安府同知高惠為姚安州同知保惠從英擊自久平之二十年命普定侯陳桓靖寧侯葉昇往雲南總制諸軍於定邊姚安等處立營屯種二十六年保以襲職遣其弟貢馬謝恩宣德九年姚安土知府高賢遣使貢馬弘治中土高高棟與普安叛賊戰死於板橋驛嘉靖三十年土官高鵠當元江之變布政使徐

樾遇害奮身赴救死之萬厯中同知高金以征緬功賜
四品服所屬大姚縣有鐵索箐者本屬種依山險以剽
掠為業旁郡皆受其害弘治間稍有歸命者分隸於姚
江洮州嘉靖中乃專屬姚安其渠羅思者有幻術造偽
印稱亂萬厯元年巡撫鄒應龍與總兵官沐昌祚討平
之諸郡乃安

鶴慶唐時名鶴川南詔置謀統郡元初置鶴州至元中
陞鶴慶府尋改為路洪武中大軍平三營分兵拔雲南

萬戶砦獲偽參政博順特穆爾等六十七人置鶴慶府
以土官高隆署府事十七年以董賜為知府高仲為同
知賜子節為安寧知州楊奴為劍川知州賜率其屬來
朝貢馬及方物詔賜冠帶及織金文綺布帛鈔錠十八
年以賜為雲南前衛世襲指揮僉事賜安寧州人世為
酋長大軍入滇率衆來降復從軍討賊有功故與子節
並有世襲知府知州之命及賜來朝以父子俱受顯榮
無以仰報子幼冲不達政治乞還父子所授官而自為

安寧知州帝曰以爾能綏靖邊鄙授爾官以酬爾勲今辭
尊居畀奈何命潁國公傳友德及諸大臣議之皆以賜
既有功不可聽其辭而節之官則可免乃改賜明威將
軍雲南前衛世襲指揮僉事諭曰雲南前衛密邇安寧
特命爾是職爾其綏輯遠人以安邊鄙其母再辭二十
年劍川土官楊奴叛大理衛指揮鄭祥討之斬八十餘
人楊奴遁未幾還劍川復聚蠻為亂祥復以兵擊斬之
二十四年置鶴慶衛三十年改鶴慶府為軍民府永樂

十五年順州知州王義言需被聖化三十餘年聲教所
屆言語漸通子弟亦有俊秀請建學教育從之正統二
年副使徐訓奏鶴慶土知府高倫與弟純屢逞兇惡屠
戮士庶與母楊氏并叔宣互相賊害敕黔國公沐昂諭
使輸款如恃強不服即調軍禽捕五年復敕右都督昂
等曰比聞土知府高倫妻劉氏同高倫弟高昌等集囉
囉麼些人衆肆行兇暴事發不從逮訊敕至即委官勘
實量調官軍禽首惡并逮千戶王蕙及高宣等至京質

問八年鶴慶民楊仕潔妻阿夜珠告倫謀殺其子復命
法司移文勘驗已而大理衛千戶奏報倫擅率軍馬意欲
謀害親母又稱其母告倫不孝及私飲民財多造兵器
殺戮軍民支解臬令等罪遂敕右都督沐昂等勘覆及
奏至言倫所犯皆實罪應死倫復屢訴因與叔宣爭鬪
又與千戶王蕙爭娶妾以致挾仇誣陷所勘殺死皆病
死及強盜拒捕之人倫母楊亦訴倫無不孝實由宣等
陷害復敕昂及御史嚴恭確訪既而奏當倫等皆伏誅

高氏族入無可繼者帝命於流官中擇人以綏遠蠻乃擢瀘州知府林遵節為知府鶴慶之改流官自此始

武定南詔三十七部之一宋淳熙間大理段氏以阿厯為羅武部長三傳至矣格當元世祖時為北部土官總管至元七年改武定路置南甸縣洪武十四年雲南下武定女土官商勝首先歸附十五年改為武定軍民府以勝署府事十六年勝遣人來朝貢馬詔賜勝誥命朝服及錦幣鈔錠十七年以和曲土官豆派為知州二十

一年發內帑令於武定德昌會川諸處市馬三千匹宣德元年元謀縣故土知縣吾忠子政來朝正德二年四月武定雨雹溪水漲決堤壞田隕霜露殺麥七月廢武定所屬之南甸縣改隸和曲州石舊縣改隸祿勸州三年土知府鳳英以從征功進秩右參政仍知府事請賜金帶部議不可帝以英有軍功給之明年英貢馬謝恩賜如例嘉靖七年土舍鳳朝文作亂殺同知以下官吏刼州印舉兵與尋甸賊安銓合犯雲南府撫臣以聞時

安詮未平朝文復起滇中大擾詔以右都御史伍文定
為兵部尚書提督雲貴川湖軍務調四鎮土漢官軍討
賊五月黔國公沐春勲疏言臣奉命會同巡撫等調發
官軍分道勦撫諸賊抗逆執留所遣官軍二人所調集
各土舍又重自疑畏臣謹以便宜榜示先給冠帶待後奏
請承襲衆始感奮於二月進兵擊斬強寇十餘人賊奔
回武定乞敕部授臣方略俾獲便宜行事并有各土舍
往罪凡有功者俱許承襲作其敵愾之氣帝納之賜敕

獎勵賊既敗歸其黨稍散初朝文給其衆謂武定知府
鳳詔母子已戮朝廷且盡勦武定蠻衆至是鳳詔同其
母率衆自會城往蠻民相顧錯愕咸投鳳詔降朝文計
無所出絕晉渡而走官兵追及復敗之朝文率家奴數
人取道霑益州奔至東川之湯浪箐為追兵所及礮死
銓衆猶盛遁據尋甸故巢列寨數十官兵分哨夾攻之
諸寨先後破乃併力攻拔其必古老巢銓奔東川入芒
部為土舍祿慶所執賊平是役也生禽渠賊千餘人斬

首二千九百餘級俘獲男婦千二百餘撫散蠻黨二萬
有奇奪器械牛馬無算捷聞銓朝文皆臬示籍其產家
屬戍邊十六年命土知府瞿氏掌印初府印自洪武以
來俱掌於土官正德間有司議以昇流官同知土知府
職專巡捕徵糧而已及鳳詔死瞿氏以母襲子官所轄
四十七馬頭阿台等數請以印屬瞿氏吏部覆言係舊
例宜如其請從之四十二年瞿氏老舉鳳詔妻索林自
代北索林襲遂失事姑禮瞿氏大恚乃收異姓兒繼祖

入鳳氏宗挾其甥壻貴州水西土舍安國亨四川建昌

土官鳳氏兵力欲廢索林以繼祖嗣不克乃具疏自稱

為索林囚禁令繼祖詣闕告之繼祖歸詐稱受朝命襲

職驅目兵逼奪府印索林抱印奔會城撫按官諭解之

索林歸武定視事如故而復聽繼祖留瞿氏所於是婦

姑嫌隙益甚索林謀誅繼祖事洩繼祖遂大發兵圍府

行劫和曲祿勸等州縣殺傷調至土官王心一等兵索

林復抱印走雲南巡撫曹忭下令收印逮其左右鄭竣

繫獄令瞿氏暫理府事貸繼祖責其自新四十四年添設府通判一員四十五年築武定新城成巡撫呂光洵遣鄭炫回府復業鄭炫者前為索林謀殺繼祖者也繼祖執而殺之糾衆攻新城臨安通判胡文顯督百戶李鰲土舍王德隆往援至雞溪子隘遇伏鰲及德隆俱死僉事張澤督甸兵二千餘馳救亦敗澤及千戶劉裕被執鎮巡官促諸道兵竝進逼繼祖東山寨圍之繼祖懼携澤及索林走照姑已復殺澤官軍追之急由直勒

渡過江趨四川依東川婦家阿科等巡按劉思問以狀
聞敕雲南四川會兵討賊初繼祖之走東川也土官鳳
氏與之通已而見滇蜀官軍與土舍祿紹先等兵皆會
乃背繼祖殺卒七千人來援繼祖益窮賊帥者色赴紹
先營降之斬繼祖以獻姚縣土官高繼先復禽其黨姚
安府同知高欽及弟鈞謀主趙士傑等皆伏誅守臣議
改設流官猶不欲絕鳳氏授索林支屬鳳厯子思堯經
厯給莊百餘鳳厯以不得知府怨望陰結四川七州及

水西宣慰安國亨謀作亂流官知府劉宗寅遣諭之不
聽遂聚衆稱思堯知府夜襲府城城中嚴備不能入退
屯魯墟宗寅夜出兵砍其營賊潰追至馬刺山禽鳳厯
伏誅萬厯三十五年繼祖姪阿克久徙金沙江外賊黨
鄭舉等誘阿克作亂陰結江外會川諸蠻直陷武定大
肆劫掠連破元謀羅次諸城索府印會流官知府携印
會城不能得賊以無印難號召劫推官請冠帶印信鎮
撫以兵未集懼差人以府印授之賊退入武定立阿克

為知府鎮撫調集土兵分五路進剿克復武定元謀羅次祿豐嵩明等州縣禽阿克及其黨至京師磔於市武定平遂悉置流官

尋甸古滇國地爨刺蠻居之號仲剗濫源部後為烏蠻裔斯丁所奪號斯丁部蒙氏為尋甸至段氏改仁德部元初置仁德萬戶後改仁德府洪武十五年定雲南仁德土官阿孔等貢馬及方物改為尋甸軍民府十六年土官安陽來朝貢馬及虎皮毼衫等物詔賜衣服錦綺鈔

錠十七年以尋甸土官沙琛為知府二十三年置本密
關守禦千戶所於尋甸之甸頭易龍驛又置屯田所於
甸頭里果馬里聯絡耕種以為邊備是後土官皆按期
入貢成化十二年兵部奏土官舍人安宣聚眾殺掠命
鎮撫官相機撫捕十四年土知府安晟死兄弟聚眾遂
改置流官嘉靖六年安銓作亂乃土舍之失職者也侵
掠嵩明木密楊林等處巡撫傳習檄守巡官討之大敗
賊遂陷尋甸嵩明殺指揮王昇唐功等知府馬性魯棄

城走時武定鳳朝文叛銓與之合久之伏誅事詳前傳
麗江南詔蒙氏置麗水節度宋時麼些蠻蒙醋據之元
初置察罕桑宣慰司至元中改置麗江路軍民總管府
後改宣撫司洪武十五年置麗江府十六年蠻長木德
來朝貢馬以木德為知府羅克為蘭州知府十八年巨
津土酋阿奴聰叛劫石門關千戶浦泉戰死吉安侯陸
仲亨率指揮李榮鄭祥討之賊戰敗遁入山谷捕獲誅
之時木德從征又從西平侯沐英征景東定邊皆有功

予世襲二十四年木德死子初當襲初守巨津州石門
關與西番接境既襲職英請以初弟虧為千夫長代守
石門從之二十六年十月西平侯沐春奏麗江土民每
歲輸白金七百五十兩皆麼些洞所產民以馬易金不
諳真偽請令以馬代輸從之三十年改為麗江軍民府
從春請也永樂十六年檢校龐文郁言本府及寶山巨
津通安蘭州四川歸化日久請建學校從之宣德五年
麗江府奏浪滄江寨蠻者保等聚衆劫掠黔國公沐晟

委官撫諭不服部議再行招撫已蘭州土官羅牙等奏
者保拒命請發兵討之帝命黔國公及雲南三司相機
行勿緣細故激變蠻民正統五年賜知府木森誥命加
授太中大夫資治少尹以征麓川功也成化十一年知
府木欽奏鶴慶千夫長趙賢屢糾羣賊越境殺掠乞調
旁衛官軍禽剿命移知守臣計畫嘉靖三十九年知府
木高進助殿工銀二千八百兩詔加文職三品服色給
誥命四十年又進木植銀二千八百兩詔進一級授亞

中大夫給誥命萬厯三十一年巡按御史宋興祖奏稅
使內監楊榮欲責麗江土官退地聽採竊以麗江自太
祖令木氏世官守石門以絕西域守鐵橋以斷吐蕃滇
南藉為屏藩今使退地聽採必失遠蠻之心即令聽諭
已使國家歲歲有吐蕃之防倘或不聽豈獨有傷國體
疏上事得寢三十八年知府木增以征蠻軍興助餉銀
二萬餘兩乞比北勝土舍高光裕例加級部覆賜三品
服色巡按御史劾其違越請奪新恩從之四十七年增

復輸銀一萬助遼餉泰昌元年增錄功賞白金表裏其子懿及舍目各賞銀幣有差天啟二年增以病告加授左參政致仕五年特給增誥命以旌其忠雲南諸土官知詩書好禮守義以麗江木氏為首云

元江古西南蠻極邊境曰惠籠甸又名因遠部南詔蒙氏以屬銀生節度徙白蠻蘇張周段等十姓戍之又開威遠等處置威遠睽後和泥侵據其地宋時儂智高之黨竄居於此和泥又開羅槃甸居之後為麼些徙蠻阿

焚諸部所據元時內附至元中置元江萬戶府後於威
遠更置元江路領羅槃馬籠等十二部屬臨安廣西元
江等處宣慰司洪武十五年改元江府十七年土官那
直來朝貢象以那直為元江知府賜襲衣冠帶十八年
置因遠羅必甸長官司隸之以土酋白文玉為副長官
二十年遣經歷楊大用往元江等府練兵時百夷屢為
邊患帝欲發兵平之故也二十六年置元江府儒學二
十七年知府那榮及白文玉等來朝貢永樂三年榮復

入朝貢帝厚加賜予遂改為元江軍民府給之印信榮
請躬率兵及餽餉往攻八百帝嘉勞之元江府又奏石
屏州洛夾橋每歲江水衝壞止令本府修理民不堪乞
命石屏州協治從之九年那榮率頭目人等來朝貢馬
及金銀器賜予如例十二年故土知府那直子那邦人
貢方物宣德五年黔國公沐晟奏元江土知府那忠被
賊刀正刀龍等焚其廨宇及經歷印信令獲刀龍刀洽
赴京乞如永樂故事發遼東安置以警邊蠻從之命禮

部鑄印給之正統元年因遠羅必甸長官司遣人來朝
貢馬正德二年以那端襲土知府嘉靖二十五年土舍
那鑑殺其姪土知府那憲奪其印并收因遠驛印記巡
撫應大猷以聞命鎮巡官發兵勦之二十九年那鑑懼
密約交蠻武文淵謀亂撫按官胡奎林應箕總兵官沐
朝弼以聞請以副使李維叅政胡堯時督兵勦之制可
那鑑益縱兵攻掠村寨沐朝弼與巡撫石簡調武定北
勝亦佐等土漢兵分五哨調兵既集朝弼與簡駐臨安

分部進兵破木龍寨降甘莊賊勢漸蹙那鑑遣經歷張維及生儒數人詣南羨監督王養浩所乞降時左布政徐樾以督餉至南羨樾迂闇聞維言謂鑑誠計窮乃約翼日令鑑面縛出城來降左右咸謂蠻詐不可信樾不聽如期親率百人往城下受降鑑縱蠻兵象馬突出衝之樾及左右皆死巡按趙炳然以聞并參朝弼簡及養浩等失事罪帝降敕切責褫簡職養浩等各住俸尅期捕賊贖罪朝弼與簡乃督率五哨兵環元江而壁令南

美哨督兵渡江攻城選路通哨甘莊哨各精卒二千佐之那鑑知二哨精卒悉歸南美潛遣兵象乘虛衝路通哨官兵不意賊至倉猝燒營走監督郝維嶽奔入甘莊哨甘莊亦大潰督哨李維亦遁惟餘南美逼城而軍武定女土官瞿氏寧州土舍祿紹先廣南懷兵頭目陸友仁咸恨那鑑戕主奪嫡誓死不退督哨王養浩因激獎之翼日鼓哨攻城賊大敗閉門不出官兵圍之鑑乞降官兵懲徐樾之敗不應城中析屋而爨斗米銀三四錢

時瘴毒起大兵乃復撤期秋未征之朝弼以事聞帝定
二哨失事諸臣罪行撫臣厚賞瞿氏祿紹先陸友仁等
敕朝弼會同新撫臣鮑象賢鳩兵討賊三十二年象賢
至鎮調集土漢兵七萬人廣集糧運尅期分哨進勦元
江為必取計那鑑懼伏藥死象賢檄百戶汪輔入城撫
諭其衆禽其賊首及戕土官那憲之阿捉殺布政徐樾
之光龍光色等皆斬首以獻鑑子恕輸所占那旂封鑾
等村寨并出所掠鎮沅府印納象十二隻輸屢歲逋賦

象賢命官民推那氏當立者衆舉前土官那端從孫從
仁象賢疏言其狀請廢恕貸其死命從仁暫統其衆加
汪輔以千戶職從之萬厯十三年以元江土舍那恕招
降車里功許襲祖職賞銀幣領長官司一曰因遠羅必
甸

永昌古哀牢國漢武帝時置不韋縣東漢置瀾滄郡尋
改永昌郡唐屬姚州後改南詔蒙氏所據厯段氏高氏
皆為永昌府元初於永昌立三千戶所隸大理萬戶所

至元間置永昌州尋為府隸大理路置金齒等處宣撫司治洪武十五年定雲南立金齒衛以元雲南右丞觀音保為金齒指揮使賜姓名李觀十六年永昌州土官申保來朝詔賜錦二疋織金文綺二疋衣一襲及銀花錦帶靴襪十七年以申保為永昌府同知四月金齒土官段惠遣把事及其子弟來貢賜綺帛鈔有差置施甸長官司以土酋阿干為副長官賜冠帶十八年置金齒衛指揮使司二十年遣使諭金齒衛指揮儲傑嚴武李

觀曰金齒遠在邊徼士民不遵禮法爾指揮李觀處事寬厚名播蠻中為諸蠻所愛然其下多恃功放恣有乖軍律故特命傑武輔之觀之寬可以綏遠傑武之嚴可以馭下敕至其整練諸軍以觀外變二十三年罷永昌府改金齒衛為軍民指揮使司時西平侯沐英言永昌居民鮮少宜以府衛合為軍民使司從之置鳳谿長官司以永昌府通判阿鳳為長官二十四年置永平衛永樂元年賜金齒土官百戶汪用鈔一百錠綵幣四表裏

以西平侯沐晟遣用招安罕的法故賞之洪熙元年金齒軍民指揮使司及騰衝守禦千戶所等土官貢馬賜鈔幣宣德五年設金齒軍民指揮使騰衝州置土知州一員時騰衝守禦所土官副千戶張銘言其地遠在極邊麓川宣慰思任發不時侵擾乞設州治帝從之即以銘為騰衝知州八年置騰衝州庫扛關庫刀關庫勒關古湧二關先是騰衝州奏本州路通麓川緬甸諸處人民逃徙者多有誤差發貢獻舊四百夫長隸騰衝千戶

所其庫扛闕等五處皆軍民兼守今四百夫已隸本州
止州民守之乞於五處置巡檢司以土軍尹黑張保李
輔郭節等為巡檢正統二年以非額革之嘉靖元年復
設永昌軍民府領州一縣二其長官司三曰施甸曰鳳
谿曰茶山

新化本馬龍他郎二甸阿剌諸部蠻據之元憲宗時內
附立為二千戶所隸寧州萬戶府至元間以馬龍等甸
管民官并於他郎甸置司隸元江路洪武初改名馬龍

他郎甸長官司直隸雲南布政司後陞為新化州十七年以普賜為馬龍他郎甸副長官宣德八年故長官普賜弟土舍普寧等來朝貢馬賜鈔幣八月黔國公沐晟奏摩沙勒寨萬夫長刀甕及弟刀眷糾蠻兵侵占馬龍他郎甸長官司衙門殺掠人民請遣都督同知沐昂討之帝命遣人撫諭但得刀甕毋擾平民正統二年晟等奏甕不服招撫請調附近官土兵令都督昂勦捕帝以蠻衆仇殺乃其本性可仍撫諭之事遂不竟其地有馬

龍諸山居摩沙勒江右兩岸束隘如峽地勢極險故改州以鎮之

威遠唐南詔銀生府地舊為濮落雜蠻所居大理時為百夷所據元至元中置威遠州洪武十五年平雲南後改威遠蠻棚府為威遠州三十五年以土官刀算黨為威遠知州永樂二年算黨為車里所擄奪其地命西平侯諭之乃還算黨并侵地三年算黨進象馬方物謝頒降敕諭金字紅牌賜之金帶織金文綺襲衣及銀鈔錦

幣二十二年土官刀慶罕等來朝貢馬及方物賜慶罕鈔八十錠紵絲羅紗及頭目以下皆有加宣德三年刀慶罕遣頭目招剛刀著中等來貢賜予如例就令齎敕及織金紵絲紗羅賜之仍給信符勘合底簿八年威遠州奏其地與車里接境累被各土官剽掠孟實當要衝乞置巡檢司以把事劉禧為巡檢從之正統二年土知州刀蓋罕遣人貢馬及銀器賜綵幣等物并以新信符給之正統六年給威遠土知州刀蓋金牌命合兵勦

麓川叛寇以捷聞敕曰叛寇思任發侵爾境土脅爾從
逆爾母招曩猛能秉大義効忠朝廷悉出金貨分賚頭
目爾母子躬擐甲冑賈勇殺賊斬其頭目派罕追逐餘
賊過江溺死數千斬首數百得其戰艦戰象仍留兵守
賊所據江口地忠義卓然深足嘉尚令特陞爾正五品
授奉政大夫修正庶尹封爾母為太宜人俱錫誥命銀
帶及綵幣表裏酬爾母子勛勞陶孟刀孟經等亦賜賚
有差爾宜益勉忠義以副朕懷時西南諸部多相仇殺

所給金牌信符燒燬不存景泰六年刀蓋罕隨乃吾等
來朝貢因命其管屬本州人民復給與金牌信符織金
文綺賜敕諭遣之成化元年威遠州土舍刀朔罕遣頭
目刀昔思貢象馬并金銀器賜予如例其俗勇健男女
走險如飛境內有河汲水煉炭上即成鹽無秤斗以篋
計多寡量之

北勝唐貞元中南詔異牟尋始開其地名北方睽始開
河白蠻及羅落麼些諸蠻以實其地號成惕昧又改名

善巨郡宋時大理段氏改為成紀鎮元初內附至元中
置施州尋改北勝州後為府隸麗江路軍民宣撫使洪
武十五年改為州隸鶴慶府後屬瀾滄衛永樂五年土
官百夫長楊克即牙舊來貢馬賜鈔幣宣德四年土判
官高琳子瑛來貢方物請襲父職十年土知州高瑛來
朝貢賜鈔幣正統七年以北勝州直隸雲南布政司設
流官吏目一員以州蠻苦於瀾滄衛官軍侵漁也萬厯
四十八年北勝州土同知高世懋死異母弟世昌襲其

族姪蘭妄稱世昌奸生訟之官不聽世昌懼逼走麗江
避之尋還至瀾滄宿客店蘭圍而縱火殺其家七十餘
人發其祖父墓自稱欽授把總大掠麗江知府木增請
討之謂法紀弁髦尾大不掉不治將有隱憂上官嘉其
義調增率其部進勦獲蘭梟之

灣甸蠻名細睽元中統初內附屬鎮康路洪武十七年
置灣甸縣永樂元年三月設灣甸長官司以西平侯沐
晟奏地近麓川地廣人稠故也尋仍改為灣甸州以土

官景宗發為知州給印章金牌并置流官吏目一員四年帝以灣甸道里險遠每歲朝貢令自今三年一貢著為令如慶賀謝恩之類不拘此例六年乃景發遣人來朝貢馬及方物賜鈔幣七年乃景發子景懸等來朝貢馬賜予如例宣德八年以土官刀景項弟景辦法繼兄職州有流官吏目一員州鄰木邦順寧日以侵削成化五年灣甸州土官舍人景拙法遣使刀胡猛等來朝貢象馬并金銀器賜宴并衣服綵幣有差萬厯十四年土

官景宗真率弟宗材導木邦叛賊罕虔入寇姚闕宗真死於陣禽宗材斬之景真子幼貸死降為州判官從從討猛廷瑞有功復職灣甸地方多瘴有黑泉漲時飛鳥過之輒墮

鎮康蠻名石睽本黑獠所居元中統初內附至元十三年立鎮康路軍民總管府領三甸洪武十五年改為鎮康府十七年改為州永樂二年遣官頒信符及金字紅牌於鎮康府七年以灣甸同知曩光為知州初鎮康地

隸灣甸曩光請增設署所故有是命九年以中官徐亮
使西南蠻曩光阻道詔責之至是遣人來朝謝罪十四
年鎮康州長官司遣人貢馬賜鈔幣二十一年知府刀
孟廣來朝貢馬宣德三年賜鎮康州土目刀門淵等鈔
幣有差成化五年知州刀門戛遣使貢馬及金銀器賜
予如例及妻鎮康後亦為木邦順寧所侵削隆慶間知
州悶坎者罕虔妻以女因附虔歸緬坎敗死其弟悶恩
歸義恩死子悶枳襲木邦恩禮誘之歸緬不從天啟二

年木邦兵據喳哩江枳奔姚闕守備遣官撫之乃退

大侯蠻名孟祐伯夷所居元中統初內附麓川路洪

武二十四年置大侯長官司永樂二年頒給信符金字

紅牌三年大侯長官司長官刀奉偶遣子刀奉董貢馬

及銀器賜鈔幣六年長官刀奉偶遣弟不納狂來貢賜

予如例宣德四年陞大侯長官司為大侯州以土官刀

奉罕為知州時刀奉罕奏大侯蠻民復業者多歲納差

發銀二百五十兩灣甸鎮康二長官民少歲納差發銀

各百兩永樂中俱陞為州乞援二州例帝諭吏部曰大
侯民多復業亦其長官善撫綏也宜增秩旌之故有是
命八年大侯州入貢遣內官雲仙往撫之并賜錦綺有
差正統三年土官刀奉漢子刀奉送來貢命齋敕并織
金文綺絨錦諸物賜刀奉漢并及其妻初奉漢令把事
傳永瑤來朝貢馬奏欲與木邦宣慰罕門發共起土兵
十萬協同征勦麓川乞賜金牌信符以安民心特賜之
復降敕嘉獎七年敕刀奉漢子刀奉送龔大侯知州賜

冠帶印章綵段表裏以奉送能率土助兵討麓川也十一年大侯知州奉外法等貢銀器象馬賜綵幣衣服皆有差十二年敕賜大侯州奉敬法刀奉送等并其妻綵幣命來使齎與之萬厯中土目奉學壻於順寧知府猛庭瑞後巡撫陳用賓誣奏廷瑞與學反狀瑞庭斬奉學首以獻學兄赦守大侯如故子奉先與其族舍猛麻奉恭爭殺抗命次年討平之改為雲州設流官

瀾滄元為北勝州地洪武中屬鶴慶府二十八年置瀾

滄衛二十九年於州南築城置今衛司領北勝浪渠永寧三州永樂四年以永寧州陞為府正統七年以北勝州直隸布政司今衛只領州一弘治十一年福建布政李韶以前任雲南叅議知土俗事宜上疏言四事一謂瀾滄衛與北勝州同一城地域廣遠與四川建昌西番野番相通邇年西番土舍章輓等倚恃山險招服野番千餘家為莊戶遂致各番生拘動輒殺人州官無兵不能禁止衛官大廢軍政恬不加意又姚安府大羅衛賓

川州地方有賊穴六七軍民受害請添設兵備副使於
瀾滄衛城以姚安大羅賓川鶴麗大理洱海景東諸府
州衛所皆令屬之於野番則用撫流民法於賊巢則用
立保甲法朝夕經理則內外寇患皆可弭矣因從其議
設兵備副使一員于瀾滄城

麓川平緬元時皆屬緬甸緬甸古朱波地也宋寧宗時
緬甸波斯等國進白象緬甸之名自此始緬在雲南之
西南最窮遠與八百國古城接境有城郭室屋人皆樓

居地產象馬元時最强盛元嘗遣使招之始入貢洪武
六年遣使田儼程斗南張禕錢允恭齎詔往諭至安南
留二年以道阻不通有詔召之惟儼還餘皆道卒十五
年大兵下雲南進取大理下金齒平緬與金齒壤地相
接土蠻思倫發聞之懼遂降因置平緬宣慰使司以倫
發為宣慰使十七年八月倫發遣刀令孟獻方物并上
元所授宣慰使司印詔改平緬宣慰使為平緬軍民宣
慰使司並賜倫發朝服冠帶及織金文綺鈔錠尋改平

緬軍民宣慰使司為麓川平緬軍民宣慰使司麓川與
平緬連境元分置兩路統其所部至是以倫發遣使貢
命兼統麓川之地十八年倫發反率衆寇景東都督馮
誠率兵擊之值天大霧猝遇寇失利千戶王昇戰死二
十年敕諭西平侯沐英等曰近御史李源德歸自平緬
知蠻情詭譎必為邊患符到可即於金齒楚雄品甸及
瀾滄江中道葺壘深池以固營柵多置火銃為守備寇
來勿輕與戰又以往歲人至百夷多貪其財貨不顧事

理貽笑諸蠻繼今不許一人往平緬即文移亦慎答之
毋忽明年倫發誘羣蠻入寇馬龍他郎甸之摩沙勒寨
英遣都督甯正擊破之斬首千五百餘級倫發悉舉其
衆號三十萬象百餘寇定邊欲報摩沙勒之役新附諸
蠻皆為盡力英選師三萬亟趨至賊列象陣搏戰英列
弩注射突陣大呼象多傷其蠻亦多中矢斃蠻氣稍縮
次日英率將士益置火鎗神機箭更番射象奔賊大敗
擣其寨斬首三萬餘級降卒萬餘人象死者半生獲三

十有七倫發遁以捷聞帝遣使諭英移師逼景東屯田
固壘以待大軍集勿輕受其降二十二年倫發遣把事
招網等來言往者逆謀皆由把事刀厮郎刀厮養所為
乞貸死願輸貢賦雲南守臣以聞乃遣通政司經歷楊
大用齎敕往諭思倫發修臣禮悉償前日兵費庶免問
罪之師倫發聽命遂以象馬白金方物入貢謝罪大用
并令獻叛首刀厮郎等一百三十七人平緬遂平自是
三年每來朝貢二十七年倫發來朝貢馬象方物已遣

京衛千戶郭均英往賜思倫發公服幘頭金帶象笏二
十八年緬國王使來言百夷屢以兵侵奪其境明年緬
使復來訴帝遣行人李思聰等使緬國及百夷思倫發
聞詔俯伏謝罪願罷兵適其部長刀幹孟叛思聰以朝
廷威德諭其部衆叛者稍退思倫發欲倚使者服其下
強留之以象馬金寶為賂思聰諭却之歸述其山川人
物風俗道路之詳為百夷傳紀以進帝褒之初平緬俗
不好佛有僧至自雲南善為因果報應之說倫發信之

又有金齒戍卒逃入其境能為火硫火砲之具倫發喜其技能俾繫金帶與僧位諸部長上刀幹孟等不服遂與其屬叛攻騰衝倫發率其家走雲南西平侯沐春遣送至京師帝憫之命春為征南將軍何福徐凱為副將軍率雲南四川諸衛兵往討刀幹孟并遣倫發歸駐潞江上招諭其部衆賜倫發黃金百兩白金百五十兩鈔五百錠又敕春曰思倫發窮而歸我當以兵送還若至雲南先遣人往諭幹孟母怙終不臣必歸而主倘不從

則聲罪討之時韓孟既逐倫發亦懼朝廷加兵乃遣人

詣西平侯請入貢春以聞三十一年奏韓孟欲假朝廷

威以拒忽都其言入貢未可信帝遣人諭春曰遠蠻詭

詐誠有之姑從所請審度其宜毋失事機春以兵送倫

發於金齒使人諭刀韓孟幹孟不從遣左軍都督何福

瞿能等將兵五千討之踰高良公山直擣南甸大破之

殺刀名孟斬獲甚衆回兵擊景罕寨寨憑高據險堅守

不下官軍糧械俱盡賊勢益張福使告急於春春率五

百騎往救乘夜至潞江詰旦渡率騎馳躡揚塵蔽天賊
不意大軍至驚懼遂破之乘勝擊崆峒寨賊夜潰幹孟
遣人乞降事聞朝廷以其狡詐命春俟變討之春尋病
卒幹孟竟不降又命都督何福往討未幾禽幹孟歸倫
發始還平緬踰年卒永樂元年思倫發子散朋來朝貢
馬賜絨錦織金文綺紗羅并僦從鈔有差二年遣內官
張勤等頒賜麓川麓川平緬木邦孟養俱遣人來貢各
賜之鈔幣時麓川平緬宣慰使思行發所遣頭目刀門

賴訴孟養木邦數侵其地禮部請以孟養木邦朝貢使

付法司正其罪帝謂蠻衆攻奪常事執一二人罪之不

足以革其俗且曲直未明遽罪其使失遠人心命西平侯

晟諭之遣員外郎左緝使八百國并使賜麓川平緬宣

慰冠帶襲衣五年麓川平緬所隸孟外頭目刀發孟來

朝貢象及金器散朋亦貢馬各賜鈔幣六年思行發貢

馬方物謝賜金牌信符黔國公沐晟言麓川平緬所隸

孟外陶孟土官刀發孟之地為頭目刀薛孟侵據請命

思行發諭刀薛孟歸侵地從之七年行發來貢遣中官
雲仙等齎敕賜金織文綺紗羅至麓川行發失郊迎禮
仙責之行發惶懼九年遣刀門柰來貢謝罪帝貸之仍
命宴勞其使并遣賜行發文錦金織紵絲紗羅十一年
行發請以其弟思任發代職從之任發遣頭目刀弄發
貢象六馬百匹及金銀器皿等物謝恩二十年任發遣
使奉表來貢并謝侵南甸州罪遣中官雲仙齎賜并敕
戒之洪熙元年遣內官段忠徐亮以即位詔諭麓川宣

德元年遣使諭西南蠻賜麓川錦綺有差以其勤修職

貢也時麓川木邦爭界各訴于朝就令使者諭解之俾

安分毋侵越黔國公沐晟奏麓川所屬思陀甸火頭曲

比為亂請發兵討帝命姑撫之置麓川平緬宣慰司所

轄大店地驛丞一員以土人刀捧怯為之從宣慰刀暗

發奏也三年雲南三司奏麓川宣慰使思任發奪南甸

州地請發兵問罪帝命晟同三司巡撫詳計以聞敕任

發保境安民不得侵鄰疆陷惡逆以滋罪咎晟以任發

侵奪南甸騰衝之罪不可宥請發官軍五萬及諸土兵討之帝以交趾四川方用兵民勞未息宜再行招諭不得已其調雲南土官軍及木邦宣慰諸蠻兵勦之八年遣內官雲仙齋敕至麓川賜思任發幣物諭其勿與木邦爭地抗殺正統元年免麓川平緬軍民宣慰司所欠差發銀二千五百兩以任發奏其地為木邦所侵百姓希少無從辦納部執不可帝特蠲之初洪武間克平雲南惟百夷部長思倫發未服後為頭目刀幹益所逐赴

京陳訴命為宣慰回居麓川分其地設孟養木邦孟定
三府隸雲南設潞江干崖大侯灣甸四長官司隸金齒
永樂元年陞孟養木邦為宣慰司孟養宣慰刀木旦與
鄰境仇殺而死緬甸乘機并其地未幾緬甸宣慰新斯
加又為木邦宣慰所殺時倫發已死子行發襲亦死次
子任發襲為麓川宣慰狡獪愈於父兄差發金銀不以
時納朝廷稍優容之會緬甸之危任發侵有其地遂欲
盡復其故地稱兵擾邊侵孟定府及灣甸等州殺掠人

民而南甸知州刀貢罕亦奏麓川奪其所轄羅卜思莊等二百七十八村於是晟奏思任發連年累侵孟定南甸子崖騰衝潞江金齒等處自立頭目刀珍罕土官早亨等相助為暴叛形已著近又侵及金齒勢甚猖獗已遣諸衛馬步官軍至金齒守禦乞調大兵進討朝命選將廷臣舉右都督方政都督僉事張榮往雲南協同鎮守右都督昂率兵討之任發方修貢冀緩師而晟遽信其降無渡江意任發乃遣衆萬餘奪潞江沿江造船三

百艘欲取雲龍又殺死旬順江東等處軍餘殆盡帝以賊勢日甚責晟等玩寇養患政亦至軍欲出戰晟不可改造舟欲濟師晟又不許政不勝憤乃獨率麾下與賊將緬簡戰破賊舊大寨賊奔景罕指揮唐清復擊破之又追之高黎共山下共斬三千餘級乘勝深入逼任發上江上江賊重地也政遠攻疲甚求援於晟晟怒其違節制渡江不遣久之以少兵往至夾象石又不進政追至空泥知晟不救賊出象陣衝擊軍殲政死焉晟聞敗

乃請益軍帝遣使者責狀仍調湖廣官軍三萬一千五百人貴州一萬人四川八千五百人令吳亮馬翔統之至雲南聽晟節制仍敕晟豫籌糧糈而晟懼罪暴卒時任發兵愈橫犯景東剽孟定殺大侯知州刀奉漢等千餘人破孟賴諸寨孟璉長官司諸處皆降之任發仍遣人以象馬金銀來修貢復致番書于雲南總兵官謂始因潞江安撫司緣舊法相邀報仇其後緣舊法乃誣已為入寇致大軍壓境惶恐無地今欲遣使謝罪乞為導

奏帝降敕許赦其罪時刑部侍郎何文淵疏請罷麓川

師命下廷臣議於是行在兵部尚書王驥及英國公張

輔等皆以為麓川負恩怙惡在所必誅須更選將練兵

以昭天討如思任發早自悔禍縛詣軍門生全之恩取

自上裁帝然之已而侍講劉球復以息兵請部覆以麓

川之征已有成命報聞六年以定西伯蔣貴為平蠻將

軍都督同知李安僉事劉聚副之以兵部尚書王驥總

督雲南軍務大會諸道兵十五萬討之時任發遣賊將刀

令道等十二人率衆三萬餘象八十隻抵大侯州欲奪
景東威遠而驥將抵金齒任發遣人乞降驥受之密令
諸將分道入右叅將冉保從東路攻細甸灣甸水寨入
鎮康趨孟定驥與貴由中路至上江會騰衝左叅將
宮聚自下江據夾象石至期合攻之賊拒守嚴銳弩飛
石交下如雨次日乘風焚其柵大竟夜不息官軍力戰
拔上江寨斬刀放戛父子禽刀孟頊前後斬馘五萬餘
以捷聞閏十一月驥率兵渡下江通高黎貢山道至騰

衝留李安領兵提脩驥由南甸至羅卜思莊前軍抵於
木籠時任發率衆二萬餘據高山立硬寨連環七營首
尾相應驥遣官聚劉聚分左右翼緣嶺上驥將中軍橫
擊之賊遁十二月進馬鞍山擣賊寨寨兩面拒江壁立
周圍三十里皆立柵開整軍不可進而賊從間道潛出馬
鞍山后驥戒中軍毋動命指揮方瑛率精騎六千突入
賊寨斬首數百級復誘敗其象陣而從東路者合木邦
人馬招降並通諸寨元江同知杜凱等亦率車里及大

侯蠻兵五萬招降孟璉長官司并攻破烏木弄戛邦等寨斬首二千五百級齊集麓川守西峨渡口就通木邦信息百道環攻復縱火焚其營賊死者無算任發父子三人挈妻孥從間道渡江奔孟養獲原給虎符金牌信符宣慰司印及所掠騰衝千戶等印三十二麓川平班師明年正月捷至勅還京時任發敗走孟蒙復為木邦宣慰所擊追過金沙江走孟廣緬甸宣慰卜剌當亦起兵攻之帝命木邦緬甸能致命禽任發獻者即以麓川

地與之未幾任發為緬人禽緬人挾之求地其子思機
發窮困乞來朝謝罪先遣其弟招賽入貢帝命遣還雲
南安置機發窺大兵歸圖恢復據麓川出兵侵擾於是
復命王驥蔣貴等統大軍再征麓川驥率師至金齒機
發遣頭目刀籠肘偕其子詣軍門求降驥遣人至緬甸
索任發緬佯諾不遣驥至騰衝與蔣貴沐昂分五營進
緬人亦聚衆待驥欲乘大帥攻之見其衆盛未易拔又
恐多一麓川敵乃宣言犒師而命貴潛焚其舟數百艘

進師薄之緬甸堅執前詔必予地乃出任發復詭以機發致仇為解驥乃趨者藍搗機發巢破之機發脫走俘其妻子部衆立隴川宣慰使而歸時思機發竊據孟養負固不服自如也十一年緬甸始以任發及其妻孥三十二人獻至雲南任發於道中不食垂死千戶王政斬之函首京師其子機發屢乞降遣頭目刀孟永等修朝貢獻金銀言蒙朝廷調兵征討無地逃死乞貸餘生詞甚哀帝命受其貢因敕總兵官黔國公沐斌及參贊軍

務侍郎楊寧等以朝廷既貸思機發以不死經畫善後
長策以聞并賜敕諭思機發十二年黔國公沐斌奏臣
遣千戶明庸齎敕招諭思機發以所遣弟招審未歸疑
懼不敢出近緬甸以機發掠其馬牛金銀欲進兵攻取
臣等議遣人分諭木邦緬甸諸宣慰司令集蠻兵尅期
過江分道討機發臣等率官軍萬人駐騰衝以助其勢
賊四面受敵必成擒矣從之已命授機發弟招審為頭
目給冠帶月糧房屋隸錦衣衛其從人俱命於馴象所

供役先是招賽安置雲南其黨有欲稱亂者乃命招賽來京且冀以徂徠機發也帝既命雲南出兵勦機發及汰斌等至騰衝督諸軍追捕機發終不出潛匿孟養遣其徒來貢許以恩貸復不至斌以春瘴作江漲不可渡糧亦乏引兵還帝以斌師出無功復命兵部尚書靖遠伯王驥總督軍務都督同知宮聚佩平蠻將軍印率南京雲南湖廣四川貴川官軍土軍十三萬人往討之至是驥凡三征麓川矣帝密諭驥曰萬一思機發遠遁則

先禽刀變壘平其巢穴或遁入緬地緬人黨蔽亦相機禽之庶壘衆知懼大軍不為徒出又敕諭斌軍事悉與驥會議而行又敕諭木邦緬甸南甸千崖隴川等宣慰司罕蓋發等各整兵備船積糧以俟調度十四年驥率諸將自騰衝會師由千崖造舟至南牙山舍舟陸行抵沙壩復造舟至金沙江機發於西岸埋柵拒守大軍順流下至管屯適木邦緬甸兩宣慰兵十餘萬亦列於沿江兩岸緬甸備舟二伯餘為浮梁濟師併力攻破其柵

寨得積穀四十餘萬石軍飽銳氣倍增賊領衆至鬼哭
山築大寨於兩峯上築二寨為兩翼又築七小寨綿亘
百餘里官軍分道並進皆攻拔之斬獲無算而思機發
思卜發復奔遁時王師踰孟養至孟那孟養在金沙江
西去麓川千餘里諸部皆震聾曰自古漢人無渡金沙
江者今王師至此真天威也驥還兵其部衆復擁任發
少子祿據孟養地為亂驥等慮師老度賊不可滅乃與
思祿約許土目得部勒諸蠻居孟養如故立石金沙江

為界誓曰石爛江枯爾迺得度思陸亦懼聽命乃班師
捷聞帝為告廟曰景泰元年雲南總兵官沐璘奏緬甸
宣慰已禽獲思機發又將思卜發放歸孟養恐緬人復
挾為奇貨不若緩之聽其自獻便從之五年緬人索舊
地左叅將胡誌等諭以銀夏等處地方與之乃送思機
發及其妻孥六人至金沙江村誌等檻送京師南寧伯
毛福壽以聞乃誅思機發於京師七年任發子思卜發
奏臣父兄犯法時臣幼無知今不敢如父兄所為甚畏

朝廷法謹備差發銀五百兩象三馬六及方物等項遣使人入貢惟天皇帝主哀憐因賜敕戒諭并賚思卜發與妻錦幣及其使幣鈔有差成化元年總兵官沐瓚等以思任發之孫思命發至京師乃逆賊遺孽不可留請發沿海登州衛安置月給米二石從之麓川亡先是麓川之初平也分其地立隴川宣撫使司因以恭頊為宣撫使恭頊者故麓川部長首先歸順効力有功因命於麓川故地開設宣撫已頭目曩渙等復來歸願捕賊自効

帝命還守本土有功即加叙諸凡來歸者視此例遂以
刀歪孟為本司同知刀落曩為副使隴帚為僉事俱賜
冠帶從宣撫恭頂請也恭頂子恭立來貢給賜如例并
授恭立為長史未幾隴川宣撫失印請再給帝責恭頂
以不能宣揚國威反失印罪應不宥姑從寬頒給時板
寨據者藍寨請擾隴川百夫長刀門線刀木立進兵圍
之斬板寨等二十三人命賜有功者皆為冠帶把事件
賚織金文綺正統十一年木邦宣慰罕蓋發來求麓川

故地有司以已設隴川宣撫司建官分管以孟止地予之報可十二年敕諭恭項言比者總兵奏爾與百夫長刀木立相仇殺人民懷怨欲謀害爾父子今遷爾於雲南俾不失所且遣官護爾家屬完聚其體憫恤無懷疑懼既而總兵官言隴川致亂皆由恭項暴殺無辜刻虐蠻人同知刀歪孟為蠻衆信服乞安置項於別衛以刀孟孟代帝以恭項來歸屈指宥之命於曲靖安置并遣敕往諭景泰七年隴川宣撫多外問遣人貢象馬及金

銀器皿方物賜綵幣襲衣如例仍命齋敕賜之以多外

問初修朝貢故也成化十九年以隴川宣撫司多歪孟

子亨法代職初隴川與木邦相鄰爭地仇殺構兵不息

嘉靖中土舍多鯨刃兄自襲下鎮巡官按問伏辜還職

兄子多參詔貲其罪并戒木邦罕孟母得復黨鯨爭職

萬歷初緬甸莽瑞體叛來招隴川宣撫多士寧士寧不

從其記室岳鳳者江西撫州人黠而多智商於隴川士

寧信任之妻以妹鳳曲媚士寧陰奪其權與三宣六慰

各土舍罕拔等歃血盟誘士寧往擺古歸附緬酋陰使其子曩烏鴆士寧并殺其妻女奪印投緬受緬偽命代士寧為宣撫及瑞體死子應裏嗣鳳父子臣服之誘敗官軍獻士寧母胡氏及親族六百餘人於應裏盡殺之多氏之宗幾盡初鳳之附於緬也為瑞體招諸部拒中國傷官軍逆勢寢成緬深倚之久之以緬不足恃而鄧川土知州何鈺鳳友壻也初使人招鳳鳳執使獻緬及是鈺復開示百方與之盟誓時官軍亦大集諸將劉綎

鄧子龍各率勁師至環壁四面鳳懼乃合妻子及部曲
來降綈責令獻金牌符印乃蠻莫猛密地乃以送鳳妻
子還隴川為名分兵趨沙木籠山先據其險而自領大
兵馳入隴川鳳度無可脫遂詣軍門降綈復率兵進緬
緬將先遁留少兵隴川綈攻之鳳子曩烏亦降綈乃攜
鳳父子往攻蠻莫蠻莫賊知鳳降馳報應裏發兵圖隴
川綈乘機掩殺賊窘乞降縛緬人及象馬來獻遂招撫
孟養賊賊將乘象走追獲之復移師圍孟璉生禽其魁

隴川平獻俘於朝帝為告謝郊廟時萬厯十二年九月也踰年復置隴川宣撫司及孟定府印陞孟密安撫為宣撫司添設安撫司二曰蠻莫曰耿馬長官司二曰孟璉曰孟養千戶所二一居姚關一居孟琳砦皆名之曰鎮安並鑄印記建大將行署於蠻莫從雲南巡撫劉世曾之議也於是多士寧之子思順襲隴川宣撫使二十九年莽應裏分道入犯一入遮放芒市一入臘撒蠻額一入沙木籠竝出隴川多思順不敵奔猛卯緬初以猛

邠同知多俺為嚮導寇東路至是大軍遣木邦罕欽禽
多俺殺之未幾思順死蠻莫思正乘喪襲隴川據其妻
罕氏三十五年思順子安民以守將索賂叛入緬已而
緬聽撫遣安民歸安民久據蠻灣桀驁甚署永騰泰將
周會遣二指揮襲之敗績王師亟討其族人挾其弟多
安靖誅之以獻時安靖尚幼勢孤詔俟其長給之印安
民弟安邦治亦附緬後寄居蠻莫其地有馬鞍摩黎羅
木等山極險峻麓川之所恃為巢穴者也

明史卷三百十四

欽定四庫全書

明史卷三百十四考證

姚安傳元立統矢千戶

臣章宗瀛按元史地理志統

矢千戶之立在憲宗七年至元十二年罷統矢立姚
州隸大理路至天歷初乃陞為路傳所載未詳謹附
識

姚安傳土舍鳳朝文作亂

臣章宗瀛按是時因安銓

之亂逃撫傳習調朝文兵千餘守厰江朝文遂據厰

江還攻武定殺同知袁倬知州秦縵等十三人見明紀事本末謹附識

尋甸傳巡撫傳習檄守巡官討之

臣章宗瀛按是時

習檄叅政黃昭道副使周奎統官軍討之敗績見識大錄謹附識

麗江傳宗時麼些蠻蒙醕扼之

臣章宗瀛按蒙醕明

統志作蒙醕醕與此小異謹附考

麗江傳三十年改為麗江軍民府

臣章宗瀛按永樂

九年九月麗江軍民府知府木初遣人貢馬賜鈔幣
見明實錄謹附識

元江傳後為麼些徒蠻阿僰諸部所據元時內附

臣

章宗瀛按阿僰諸部以憲宗四年內附七年復叛至
元十三年遙立元江府以羈縻之二十五年命雲南
王討平其地乃更置元江路此所載未晰謹附考

永昌傳洪武十五年定雲南立金齒衛

臣章宗瀛按

明實錄永昌洪武十五年三月己未仍為府屬布政

司地理志所載同傳未詳謹附識

永昌傳其長官司二

臣章宗瀛按地理志稱永昌所

屬長官司三曰施甸曰鳳谿曰茶山茶山為永樂五
年析孟養地置屬金齒軍民司嘉靖元年屬府此所
載獨遺茶山謹畫一增

鎮康傳十七年改為州

臣章宗瀛按鎮康降為州後

尋廢以其地屬灣甸州永樂七年七月復置見明實

錄傳未載謹附識

鎮康傳以中官徐亮使西南蠻

臣章宗瀛按徐亮使

西南時曩光阻道並劫奪賜物至是遣頭目刀怕愣等來朝乞貸罪復遣給事中周讓行人方濬往戒諭之見明實錄謹附識

大侯傳六年長官刀奉偶遣弟不納狂來貢

臣章宗

瀛按永樂九年六月刀奉偶遣弟混三等貢馬及方物賜鈔及文綺襲衣見明實錄傳未載謹附識

瀾滄傳福建布政李韶以前任雲南叅政知土俗事宜

上疏言四事

臣章宗瀛按明實錄李韶是疏在弘

治十二年九月乙丑此作十一年又韶前任雲南右
叅政此作叅議均誤謹擬改

麓川傳任發方修貢冀緩師

臣章宗瀛按思任未叛

時孟養宣慰司刀賓玉嘗遣思任質晟府晟兒子畜
之至是晟遣指揮車琳等諭降思任佯諾晟遂信之
見明紀事本末謹附識

麓川傳政追至空泥

臣章宗瀛按政是時與其子瑛

部將顧勇等乘勝深入比至空泥知無援乃遣瑛還而身與顧勇等陷陣死見識大錄謹附識

麓川傳仍勅晟豫籌糧糈

臣章宗瀛按正統四年五

月以沐昂為征南將軍充總兵官討賊明年五月昂抵隴把以糧乏引歸叅將張榮敗績於芒市下詔切責見明實錄謹附識

麓川傳百道環攻復縱火焚其營

臣章宗瀛按是時

都督同知李安駐潞江護餉道既而賊破安恥已功

不與聞賊有屯於高黎貢山者往攻之不利為賊所躡都指揮趙斌等傷者千八百餘人明年六月論斬下獄見明實錄謹附識

麓川傳於是復命王驥蔣貴等統大軍再征麓川

臣

章宗瀛按驥等再征麓川之命在正統七年九月見明實錄本紀作八月誤謹附考

麓川傳大軍遣木邦罕欽禽多俺殺

臣章宗瀛按多

俺就戮之後旋築平麓城於猛卯以興屯田見一統

志謹附識





明史卷三百十四考證

